

四經同卷

佛說犢子經

毀四

乳光佛經

無垢賢女經

腹中女聽經

佛說犢子經

吳月支優婆塞支謙譯

聞如是一時佛在舍衛國祇桓阿那邠遲阿藍精舍。爾時佛遇風患，當須牛乳。時有婆羅門大富，去城不遠。時佛遣阿難言：「汝往到婆羅門家，婆羅門問阿難來何所求。」阿難言：「如來向者小遇風患，使我來乞牛乳耳。」婆羅門言：「牛在彼間，自犖取之。」阿難即往到牛所，犖牛性常弊惡，無人能近。阿難即自思：「惟我法不應自犖取牛乳。」爾時帝釋知阿難所念，即來化作婆羅門像，在牛邊立。阿難往，倩言：「婆羅門，為我犖取牛乳。」婆羅門言：「諾。」即前以右手捫

摸牛乳，語牛言：「如來遇小風患，汝與乳種，令如來服之。羞者汝得福無量，不可稱計。如來者是天上天下之大師也，常以慈心憂念一切蠕動之類，欲令度脫一切苦惱。」牛言：「此手捫摸我乳，一何快耶！」前兩乳取去，置後兩乳。用遣我子，我子朝來，未有所食。爾時犢子在邊立，住聞有佛名，即語母言：「持我乳分，盡用與佛。佛者是天上天下之大師也，甚難得值。我自食草飲水，足得活耳。何以故我先身以來常飲乳食，今作畜生牛身，亦復飲乳。世間愚癡者甚多，無量我先世時坐隨惡知識，教不信佛經，使我作牛作馬。經十六劫而今乃得聞有佛名，持我所食乳分，盡用與佛。滿器而去，令我後世智慧聰明，得道如佛。」阿難持乳還至佛所，佛問阿難：「彼牛母子有何言說？」阿難言：「大可怪也。牛先甚弊惡，不可得近。有一婆羅門為我犖乳，牛即調善。子母共說佛言：此牛子母先世之時不信佛經，故墮牛馬。」

中經十六劫今乃得悟聞有佛便有我慈心
 以乳施佛彼牛母子後身當為弥勒佛作沙
 門弟子得大羅漢犢子死後當為我懸繒幡
 蓋散華燒香受持經戒過二十劫後當作佛
 名乳光如來度脫一切佛言牛以好心善意
 與佛乳故度諸苦難得無量福報以是因緣
 佛不可不事經不可不讀道不可不學普告
 天上天下皆悉令知

佛說犢子經

佛說乳光佛經

西晉三藏法師竺法護譯

聞如是一時佛遊維耶離梵志摩調音樂樹
 下與八百比丘眾千菩薩俱國王大臣人民
 及諸天龍鬼神共會說經時佛世尊適小中
 風當得牛乳尔時維耶離國有梵志名摩耶
 利為五万弟子作師復為國王大臣人民所
 敬遇豪富貪嫉不信佛法不喜布施但好異

道常持羅網覆蓋屋上及其中庭欲令飛鳥
 不侵家中穀食之故所居處去音樂園不近
 不遠於是佛告賢者阿難持如來名往到梵
 志摩耶利家從其求索牛乳種來阿難受教
 著衣持鉢到其門下梵志摩耶利適與五百
 上足弟子欲行入宮與王相見時即出舍值
 遇阿難因問言汝朝來何其早欲何所求阿
 難答曰佛世尊身小不安隱使我晨來索牛
 乳種梵志摩耶利默然不報自思惟我若不
 持乳種與阿難者諸人便當謂我慳惜適持
 乳與諸餘梵志便復謂我事瞿曇道進退唯
 宜雖尔續當指授與弊惡牛自令阿難擊取
 其乳又是瞿曇喜與我等共諍功德常欲得
 其勝當使是弊惡特牛觝殺其弟子即可折
 辱其道便見捐棄我可還為眾人所敬阿難
 得乳若不得乳趣使諸人明我不惜為牛所
 殺不能得乳我意已達於我無過梵志摩耶
 利時謀議是事已即告阿難牛朝已放在彼